

boca di quella humana, et doveva ussir con el primo tempo, qual tiensi anderà a danno di tutti come è solito.

77 *Scurtinio di do provedadori sora l'Armar.*

† Sier Sebastian Moro, fo provedador in armada, qu. sier Damian.

Sier Polo Nani, è di Pregadi, *el grando*, qu. sier Giacomo.

Sier Zacaria Loredan, fo podestà e provedador a Crema, qu. sier Luca.

† Sier Vincenzo Capelo, fo provedador in armada, qu. sier Nicolò.

Sier Nicolò Pasqualigo, fo di la Zonta, qu. sier Vettor.

Sier Hironimo Trivixan, fo ai X Savii, qu. sier Domenego.

Non. Sier Gasparo Malipiero, fo savio a Terra ferma, qu. sier Michiel, per esser in officio.

Et licentiatò il Pregadi, era hore 22, restò Consejo di X con la Zonta, per far certa ubligation a una partida ha da far sier Alvise Pixani procurator *dal Banco*, per far certa civanza per trovar danari per armar; *tamen* al Consejo non parse star su interessi, et preseno che li Provedadori sora il fisco debano vender al publico incanto le possession di Bagnol in visentina, di Hironimo da Nogarola, rebele, qual è bellissima, campi 1200, ha jurisdiction grande, paga livello ducati 250; se venderà da ducati 10 milia in suso.

In questa matina, vene in Colegio Alvise Sabadin secretario, stato per la Dalmazia do mesi *cum* l'ambasador dil Turco. *Item*, ozi partino, da poi disnar, per Treviso sier Gasparo Malipiero e sier Bortolamio Contarini provedadori sora le aque, con li protti et inzegneri vanno in Trevisana a veder far condur le aque, con i qual *etiam* andoe, di ordine dil Colegio, sier Marco Morexini qu. sier Alvise da San Cassan auctor de tal bona opera che zuova a tutti e a niun noce. Starano 10 zorni fuora, et li fo data la commission per Colegio.

Et essendo Consejo di X suso, vene *lettere di Friul, dil Locotenente*, con uno aviso auto il ducha di Baviera era stà fato vicegerente a l'Imperio etc. Fo ordenato questa nova tenir secreta, etc.

Fo expedito lettere a Roma per li Cai di X, in materia de lo arziepiscopo di Candia retenuto, solecitando l'Orator nostro de aver risposta.

A di 5. La matina, el Doxe se intese esser *totaliter* varito, vene in Colegio portato su una cariega, vestito de negro per la morte di suo cuxin sier Vettor. Vene sier Alvise di Garzoni baylo e capitano a Corfù, et sentato apresso i Savii dil Consejo, referite di quelle fabriche e cosse di Corphù.

Poi, perchè contra di lui fo mandato a Corphù Philippo Zamberti nodaro di l'Avogaria, qual insieme col Baylo novo dovesse formar processo contra di lui etc., el qual non è ancora tornato; ditto sier Alvise volse poi audientia con li Cai di X, et disse quello li parse.

Vene *etiam* sier Lodovico Michiel venuto provedador di Salò, vestito damaschin negro, in loco dil qual è andato sier Constantin Zorzi. Et non ave tempo da referir, disse poco, et fo laudato dal vice doxe, justa el solito.

In questa matina, in Rialto, per li Procuratori fu venduta una altra possession di campi 219 a Pontichio, a ducati 75 il campo. *Item* el Monte nuovo val ducati 20 al cento.

Da poi disnar, fo Colegio di Savii *ad consulendum*.

Fo *lettere di Milan et di Franza, di 21*, el suario dirò poi.

In questa matina, vene in Colegio l'orator dil re di Franza, per saper di nove, per alcune zanze se diceva esser stà electo re di Romani. Li fo risposto nulla era da conto, et poi li fo mandato a dir la lettera di 3 di Friul, de la creation dil duca di Baviera, che *tamen* non si creleva. El qual orator rispose Dio volesse fusse cussi, perchè el Christianissimo re saria fuora et atendaria ad altro.

Si parti ozi el conte Zuane di Corbavia. Va a Zara per andar a li soi castelli ben satisfato de la Signoria, e ha auto ducati 500 et *etiam* danari per conto dil suo credito vechio.

A di 6. Se parti sier Antonio Surian dottor et cavalier, va orator in Anglia. Et in Colegio non fo alcuna lettera. In Quarantia achadete, cossa forse non più achaduta, che di certo caso di alcuni vesentini, et villani etc., per sier Zuan Dolfin e sier Lorenzo Orio dottor *olim* avogadori et disputato molti Consegi la causa, et posto proceder contra li absenti, fo preso di no, che sempre se suol dir *contra absentes omnia jura clamant*; et cussi el resto di apresentati villani fono assolti.

Fo in Rialto deliberato per li Procuratori una possession a Lendenara di campi 122 a li Procuratori de la chiesa di San Marco, per ducati 61 el campo, di Monte nuovo, di danari.